

## Chimborazo - Cushichin Quillcachishca - Comfort Scriptures

2 Corintios 1:2-4 Ñucanchij Dios Yayapaj, Mandaj Jesucristopaj mana c'uyaipajta c'uyaj canapish, sumaj causaipish cancunahuan cashca cachun ninchijmi. 3 Ñucanchijta Mandaj Jesucristopaj Dios Yayataca, alli nishca cachun. Paica llaquij Yayami, tucuipi cushichij Diosmi. 4 Paimi tucui ñucanchij llaquicunapipish cushichin. Shujtajcuna ima llaquipi cajpipish, Dios ñucanchijta cushichishca shinallataj cushichichunmi, ñucanchijtaca chashna cushichin.

Proverbios 15:13 Cushijlla shunguyuj runaca, ñahuipish cushijllami purin.

Ashtahanpish shungutaj llaquilla cajpica, yuyaipish llaquillami tucun.

1 Reyes 8:66 Pusaj punllapica jatun mandaj Salomonca tucuicunatami caya minchacamachij nirca. Paicunapish jatun mandajtaca Dios allicunata cuchun nishpaca, paicunapaj huasicunamanca yallitaj cushijlla shungucunahuanmi tigrarcacuna. Mandaj Diosca paipajta ruraj Davidpajpish, pai agllashca israelcunapajpish achca allicunata cushcamantami chashna tigrarcacuna.

1 Crónicas 16:10 Jucha illaj Diospaj shutimanta cushicuichigari. Mandaj Diosta mashcajcunapaj shunguca cushicuchun.

Proverbios 12:25 Ima llaquimanta shungu p'aquirijpica, ima yuyaipish chingarinmi. Shina cajpipish c'uyaihuan rimashca shimicunaca cushichinmari.

Proverbios 13:12 Shuyacushca utca pajtashcaca, causaita cuj yura shinami. Ashtahanpish mana utca pajtajpica, shungu p'aquirishpami llaquirincuna.

Isaías 30:26 Pai agllashcacuna chugririshcata Mandaj Dios maillashpa huatacui punllapi, carachahuan cajta jambicui punllapica, lunaca inti shinami achijyachinga. Inticarin canchis inti tandanacushpa achijyachishcata yallitami achijyachinga.

Oseas 13:8 Huahuacunata chingachishpa mama oso p'iñarishpa puricuj shinami israelcunataca llaquichisha. Paicunapaj corazontaca llujshichishpami shitasha. Sacha animal shinami mirga mirgata rurasha. León shinami millpusha.

1 Samuel 1:8,10 Paipaj cusa Elcanaca: "Ana, ¿imamantataj huacanguí? ¿Ima nishpataj mana micungui? ¿Ima nishpataj cambaj shunguca llaquilla? ¿Manachu ñucallataj cambajca chunga churicunatapish yalli cani?" nijmi carca. 10 Chaipimi Anaca shungumanta llaquirishpa achcata

- huacashpa Mandaj Diosta mañarca.
- Salmos 25:16,17 Mandaj Dioslla ñucallamari cani. Llaquicunahuan huañucunimari. Mandaj Dioslla, ricuhuayari llaquihuayari. 17 Ñuca shungupi llaquicunaca jahuanpi jahuanpimari mirarin. Chai llaquicunamantaca llujshichihuayari.
- Salmos 34:18 Mandaj Diosca shungupi llaquilla cajcunapaj c'uchullapimi. Espiritupi llaquilla cajcunata quishpichinmi.
- Salmos 38:8 Tucui aicha ñutushca shinami cani, yallitaj irquiyanica. Ñuca shungupica yallitaj llaquihuan canica. Caparicunica.
- Salmos 55:4 Ñuca shunguca nanaihuanmari. Huañuna manchaimari ñucataca japistha.
- Salmos 61:2,3 Cai pacha tucurimantami quiqintaca caparisha. Ñuca shungu shaicurijpimi caparisha. Ñucata yalli ashtahuan jatun rumiman pushahuayari. 3 Quiquinca ñuca pacá tucunami carcangui. Ñucata p'iñajpaj ñaupajpica sinchi torremi carcangui.
- Salmos 62:8 Gentecuna, paillapi shunguta churaichigari. Tucui causaipi paillata shuyaichigari. Tucui shunguhuan paipaj ñaupajpi mañaichigari. Taita Diosca ñucanchij pacá tucunamari. Selah
- Salmos 73:26 Ñuca aichapish ñuca shungupish urmarinmari. Shina cajpipish ñuca shungu samarina rumica Jatun Diosmari. Huiñaipaj ñuca charinaca Jatun Diosmari.
- Salmos 77:2,3 Ñuca llaquihuan cai punllapica, Jatun Diostami mashcarcani. Tutapish mana samarishpami maquicunata huichi chutashpa paitaca mañacurcani. Ñuca almapish mana cushicui tucurcachu. 3 Taita Diosmanta yuyarishpaca aij nircanimi. Ñuca espiritupish aij nicushpallami chahuata huañurca. Selah
- Salmos 86:11 Mandaj Dioslla, quiquinpaj ñanta yachachihuayari. Quiquinpaj mana llullapimi purisha. Quiquinpaj shutita manhashpa causanata ñuca shungupi sinchiyachiyari.
- Salmos 109:22 Ñucaca llaquichishca ima illajllamari cani. Ñuca shungupish tucui chugririshcamari cani.
- Salmos 112:7,8 Llaquicunami shamugrin nishpa huillajpipish, paica mana manchangachu. Mandaj Diospi paipaj shunguta churashpami imata mana manhashpa causanga. 8 Paipaj shungupica, imata mana manchangachu. Paita p'iñajcunata pai munashca shina tucuja ricungacamami mana manchanga.
- Salmos 143:4 Ñuca espirituca yallitaj llaquirishcami. Ñuca shunguca yallitaj llaquihuanmari.
- Salmos 147:3 Paimi shungu p'aquirishcacunataca alliyachin. Paicunapaj

chugricunatapish paimi jambishpa pilluchin.

Proverbios 14:30 Cushijlla shunguca, aichamanpish causaita cunmi.

Ashtahanpish shujtajcuna shina canata munanaca tullu ungüitapishmi apamun.

Eclesiastés 1:13 Ñucaca cai pachapi causajcuna imallata rurashcatami yachangapaj alli yuyaihuan tucuita callarishpa ricurcani. Cai pachapi causajcunaman Taita Dios cushca ruranacunaca, yallitaj llashaj shinami.

Eclesiastés 2:10 Ñuca ñahuihuan ricushpa imata munashpapish, mana jarcarircanichu. Ima shina cushicusha nishpapish chashnatajmi cushicurcani. Ñuca tucui imalla rurashcahuanmi tucui shunguhuan cushicurcani, ñuca trabajomantaca chaitami japircani.

Eclesiastés 2:22,23 Inti achijyachicun pachapi causajcunaca yangallami imatapish mana samashpa, chai yuyai rurancuna. Chai tucui rurashcacunamantaca, imata mana japincunachu. 23 Tucui causaipimi llaquita nanaita apancuna. Paicunapaj causaica llashajta aparishca shinami. Imata rurangapajpish tutapish mana dormishpami, achcata yuyaricunllacuna.

Eclesiastés 11:10 Cambaj shungumantaca p'iñarijlla canata anchuchi, cambaj aichahuan ima mana allita ruranamantapish ch'icanyailla. Q'upi huiñaicuna chairaj cashca punllacunapi cushicunaca utca tururij yangallami.

Isaías 30:29 Ashtahanpish cancuna cantashcaca Pascua tutapi fiestata rurashpa cantashca shinami uyaringa. Israelcuna miticuna Mandaj Diospaj urcuman flautacunapi tocashpa huichiyacujpi cushicuj shinami, cancunapaj shunguca cushicunga.

Isaías 57:15 Jahuajman caj, tucuita yalli jatun, huiñaita causacuj, jucha illaj shutica cashnami nin: "Ñucaca jahuajman ima jucha illajpimi causani. Ashtahanpish ñucaca llaquihuan cajcunahuan, mana jatun tucushcacunahuanmi causani. Mana jatun tucushcacunata, shungu p'aquirishcacunata jatarichingapajmi paicunahuan causani.

Isaías 65:14 Ñucapajta rurajcunaca, tucui shunguhuan cushicushpami cantangacuna, ashtahanpish concunaca shungu nanaihuanmi caparinguichij. Shungu p'aquirishpami jatunta caparishpa huacanguichij.

Isaías 66:13,14 Mama paipaj huahuata cushichij shinami, ñucapish concunataca cushichisha. Jerusalenpimi cushicuita chasquinguichij" ninmi. 14 Chaita ricushpaca, concunapaj shunguca cushicungami. Concunapaj tullucunaca llullujlla q'uihua shinami mushujyanga. Mandaj Diosca paipaj maqui tucuita rurai tucuj cashcatami paipajta rurajcunamanca rijsichiringa. Ashtahanpish paita p'iñajcunahuanca

p'iñaringami.

Jeremías 15:16 Tucuita Mandaj Dioslla, ñucaca canhuanmi casha nihuarcanguimari. Chaimantamari cambaj shemicunata ñucaman cujpica, cushicushpa ñuca shungupi chasquij carcani. Cambaj shimi uyarijpica, japishcahuanmari micuj carcani.

Jeremías 24:7 Paicunaca, tucui shunguhuanmi ñucapajman cutiringacuna. Ñucataca Mandaj Diostaj cashcata rijsichun paicunamanca alli shungutami cusha. Chashnami paicunaca ñuca runacuna canga. Ñucapish paicunapaj Diosmi casha" nircami.

Juan 14:1 –Ñuca rigrini nijpipish ama mancharichijchu. Yaya Diostapish crichij, ñucatapish crichij.

Juan 14:27 Cancunamanca ñuca sumaj causaitami cuni, sumajta causachunmi chaitaca saquini. Cai pachapaj cajcuna cushca shinaca mana cunichu. Chaimanta cancunapaj shungupica ama musparinguichijchu, ama mancharinguichijchu.

Juan 16:6 Ashtahuanpish caicunata ñuca nijpica llaquirinallatami yallitaj llaquiringuichij.

Juan 16:22 Chashnallatajmi cancunapish, cunanca llaquilla canguichij. Cutin ñuca ricuj shamujpimi, cancunaca cushicunguichij. Chai cushicuitaca, cancunamantaca pi manataj quichungachu.

Hechos 2:46 Taita Diospaj huasipipish, punllantami shuj yuyailla tandanacurcacuna. Jesús huañushcata yuyarishpa tandata micunatapish paicunapaj huasicunapiplish micurcacunami. Chaitaca tucuicuna cushicushpa alli shunguhuanmi micurcacuna.

Romanos 9:2 Ñucaca jatun llaquitami charini. Chai nanaica ñuca shungupi caticunllami.

2 Corintios 2:4 Shungupi achca llaquihuan cashpami, achca huiqui ñahui cancunamanca quillcarcani. Mana llaquichingapajchu, ashtahuanpish ñuca cancunata jatunta c'uyashcata yachachunmi chashna quillcarcani.

Efesios 5:19 Cancunapura salmocunahuan, himnocunahuan, cantocunahuan yuyachinacushpa, cancunapaj shungucunapi, Mandaj Jesusta cantashpa alabaichij.